

Här Fernand Etgen
President vun der
Deputéierte Chamber
19, um Krautmaart
L-1728 Lëtzebuerg

Lëtzebuerg, den 30. Abrëll 2020

Här President,

esou wéi d'Chambersreglement et virgesäit, bieden ech Iech, dës parlamentaresch Fro un den Här Educatiounsminister weiderzeleeden.

An deene leschten Deeg si jo schonn déi verschiddenst Aspekter vum Deconfinement beliicht ginn. Iwwert d'Schicksal vun de Jugendhaiser ass awer nach näischt gesot ginn, ausser datt a verschiddene Gemengen dru geduecht gëtt fir déi Raimlechkeeten ze benotze fir Plaz fir Crèche oder aner Betreuungsstrukturen ze schafen.

D'Jugendhaiser sinn awer hautdesdaags e ganz wichtegt Element an der sozialer Aarbecht. Si sinn eng wichteg Stäip fir fragiliséiert Jonker a bidden hinne qualifizéiert a motivéiert Uspriechpartner. Si hunn wichteg edukativ Aktivitéiten, déi ville Jonken eng gewëssen Autonomie kënnen ginn. Am *Outreach* gëtt geziilt no deene Jonken op der Strooss gekuckt (*NEET - Not in Education, Employment, or Training*).

Esou wichteg Aktivitéite bedéngen dacks e perséinlecht Gespréich an enger vertrauensvoller Atmosphär a kënnen net duerch digital Kontakter ersat ginn.

An dem Zesammenhang wollt ech dem Här Educatiounsminister dës Froe stellen:

1. Wat plangt d'Regierung am Hibleck op d'Reouverture vun de Jugendhaiser?
2. Wéi gëtt während der Kris déi sozial Aarbecht mat deene fragiliséierte Jonken organiséiert? Wéi gëtt d'Kontinuitéit vun der Betreung garantéiert?
3. Ass et richtig, datt verschidde Jugendhaiser sollen zu Betreuungsstrukture fir Kanner ëmgewandelt ginn? Wa jo, wou a fir wéi laang? Wéi eng Konsequenzen hätt dat op déi sozial Aarbecht mat deene Jonken?

4. Wat geschitt fir déi Zäit mam Personal vun de Jugendhaiser? Musse si an der Kannerbetreung mathëllefen oder bleiwen si fir d'Kontakter mat deene fragiliséierte Jonke verantwortlech? Kënnen d'Membere vum Personal bei hirer eventueller Reaffektéierung mat decidéieren? Gëtt et do eng allgemeng aarbechtsrechtlech Reegelung oder gëllen an ënnerschiddleche Jugendhaiser aner rechtlech Bedéngungen?

Mat déiwem Respekt,



Fernand Kartheiser
Deputéierten

Ad 1)

D'Jugendhaiser ware vu virun der Coronakris bis haut ëmmer operationell. Och wa keng Aktivitéiten am Haus konnte stattfannen, war an ass bis haut déi digital Jugendaarbecht mat de Jonken aus der Gemeng vun de Jugendaarbechter aus dem Jugendhaus iwwer Internet, déi sozial Medien an Telefon assuréiert. Den Educatiounsministère huet am Kontext vun der Réouverture vum Enseignement fondamental op kommunalem an op nationalem Plang en Appel un déi edukativ Strukturen op Gemengenniveau gemaach, fir datt Personal an Infrastrukture kënnen zur Verfügung gestallt ginn.

Den Educatiounsministère huet dono eng detailléiert Bestandsopnam vun de Jugendhaiser gemaach, fir e kloert Bild vun de Ressourcen a puncto Personal an Infrastrukturen no der Ouverture vum Enseignement fondamental ze kréien a fir ze kucken, ënnert welleche sanitäre Konditiounen d'Aktivitéiten am Jugendhaus selwer erëm kënnen ulafen.

Dës Bestandsopnam war d'Basis fir eng progressiv Réouverture vun alle Jugendhaiser bis de Summer 2020 ze plangen. Eng progressiv Réouverture vun de Jugendhaiser wäert ëmmer ënner de jeeweilege sanitäre Konditiounen stattfannen, esou wéi se vun der Regierung décidéiert ginn. Dëst bréngt Restriktiounen vun den Aktivitéite vum Jugendhaus mat sech an eng flexibel Upassung un déi sanitär Konditiounen. Esou sinn individuell Gespréicher mat engem Jonken am Jugendhaus méiglech, sou wéi och opsichend Jugendaarbecht vum Educateur baussent dem Jugendhaus. Aktivitéite fir gemëschte Gruppen, sou wéi se am Jugendhaus ugebuede ginn, sinn de Moment nach net méiglech aus sanitäre Grënn.

Ad 2)

D'Betreiung vun de Jonke gouf zanter dem Ufank vum Confinement iwwer de Wee vun der digitaler Jugendaarbecht, spriech iwwer déi digital Medie, garantéiert. Dëst huet de Jugendhaiser erméiglecht, mat hire Jonken iwwer divers digital Plattformen (z. B. Homepage, eeg Facebooksäit, Facebook-Messenger, Whatsapp, Snapchat, etc.) a Kontakt ze bleiwen.

Virum Confinement gouf et schonns eng enk Vernetzung tëscht de Jugendhaiser, wat et erméiglecht huet, während dem Confinement en Austausch un Iddien a Betreuingskonzepter ze garantéieren.

Doriwwer eraus ginn déi Jonk vun de Jugendhaiser ëmmer um aktuelle Stand gehalen, wat d'Mesurë vun der Regierung an dëser Kris ugeet. Iwwer déi digital Jugendaarbecht kënnen déi Jonk mat dem edukative Personal sech austauschen an och nofroen, wann hinnen eppes net kloer ass oder si veronséichert sinn.

Ad 3)

Den Educatiounsministère gesäit net vir, datt Jugendhaiser sollen zu Betreuingsstrukturen ëmgewandelt ginn. Au contraire ass et wichteg, datt all eenzelt Jugendhaus fir déi Jonk an hiren Gemeng an Ëmgéigend accessibel ass a progressiv seng normal Aktivitéiten nees ophuelen kann.

Fir d'Reouverture vum Enseignement fondamental ze garantéieren, ass den Appel un d'Jugendhaiser erausgaangen, fir mat hiren Gemeng, déi zu 50 % de Finanzement an d'Responsabilitéit vun de

Gebailechkeete vum Jugendhaus dréit, zesummenzeschaffe fir de Fall, wou Personal a Gebailechkeete gebraucht ginn. Deem Appel sinn alleguer d'Jugendhaiser nokomm an hunn hir Hëllef ugebueden. An deene Gemengen, wou op d'Ressourcë vun de Jugendhaiser zeréckgegraff ginn ass, ass den Engagement vun dëse Ressourcë gebonnen un de Fonctionnement an d'Dauer vum Enseignement en alternance, esou wéi en de 25. Mee 2020 en place gesat gouf.

Iwwerdeems ass awer déi digital Jugendarbecht, eng 1 zu 1 Betreierung fir déi Jonk am Jugendhaus, sou wéi och opsichend Jugendarbecht an der Gemeng vun all Jugendhaus garantéiert, esou datt déi sozial Aarbecht mam Jonken a Continuitéit ka stattfannen.

Ad 4)

Een Deel vun de Jugendarbechter hëlleft an deene Gemengen mat aus, wou si gebraucht ginn fir an der Kannerbetreierung als Educateur matzeschaffen. De Kontakt mat de Jonken, ënner anerem de fragiliséierte Jonken, ass iwwer d'Präsenz vum aneren Deel vun der Jugendhausekip assuréiert, déi net an der Kannerbetreierung engagéiert sinn.

D'Gestionnairë vum Jugendhaus sinn invitéiert ginn, fir zesumme mat hire Gemengen ze kucken, wéi eng Affektatioun am sënnvollste fir d'Jugendarbechter vum Jugendhaus ass, an och esou, datt d'Jugendhaus ka weider operationell bleiwen. Et ass dëst d'Entscheidung vum Gestionnaire zesumme mat der Gemeng.

D'Konventioun vum Educatiounsministère mat den eenzele Gestionnairen a Gemenge si konform zum SAS-Kollektivvertrag gereegelt. Den Educatiounsministère huet eenheetlech Kontrakter ausgeschafft, déi fir all dat Personal gëllen, dat an dem Enseignement en alternance engagéiert ass oder aushëlleft. Et besteet also eng allgemeng an eenheetlech aarbechtsrechtlech Reegelung.